

“IL LIBRI MAMAN!” DÂT FÛR IN 20.000 COPIIS AI ARLÊFS DES SCUELIS PRIMARIIS

Une impuartante iniziative ARLeF e USR pe educazion plurilengâl

“I Libri di Maman!” al è il gnûf prodot editoriâl realizât de Agjenzie Regjonâl pe Lenghe Furlane che, in graciis de colaborazion sinergjiche cul Ufici Scolastic Regjonâl dal Friûl – Vignesie Julie, al è cumò a disposizion di ducj i students des scuelis primariis dal teritori furlanofon. Il proget al è stât presentât di resint in une conference stampe là che a àn partecipât l'Assessôr aes Autonomiis Locâls, Pierpaolo Roberti, il President de ARLeF, Eros Cisilino e la referente pe lenghe furlane dal Ufici Scolastic Regjonâl, Paola Cencini.

Dât fûr in 20.000 copiis ai students di 180 istitûts scolastics des ex provinciis di Udin, Pordenon e Gurize, Il Libri di Maman! si compon di doi volums diferents par fasce di etât: il prin pai arlêfs des classis 1e e 2e, il secont pes classis 3e, 4e e 5e. In gracie dai materiâi che si cjatin dentri – zûcs, contis, proverbis, curiositâts, ricetis, lavoruts, tescj di letature e conseis

di leture – i libris si podaran doprâ tes ativitâts didatichis e in chês di grup, par compagnâ i fruts te discuierte di peraulis gnovis e di gnûfs sunôrs, clamantju a doprâ la lenghe furlane in maniere ative.

“Il Libri di Maman!” al è pensât par dâ a insegnants e students un supuart util par imparâ il furlan midiant dal zûc, dal divertiment e de creativitât – al marche il president de ARLeF, Eros Cisilino -. I dâts dal an scolastic 2019/2020 a metin in evidence che il 76% dai gjenitôrs al à sielzude la opzion dal furlan intal moment de iscrizion dai fîs te scuele de infanzie e primarie.

Une percentuâl cressude intai ultins agns, che e mostre ben cemût che lis fameis de nestre regjon a sedin simpri plui cussientis dai tancj vantaçs, cognitîfs e sociâi, che al da il plurilinguism, come che a dimostrin lis ricercjis sientifichis plui avanzadis. I volums che o vin dât fûr in sinergjie cul Ufici Scolastic Regjonâl, pe ARLeF a son dome il prin pas par garantî ae scuele un materiâl di cualitât pe educazion plurilengâl par furlan.”

I contignûts dai doi volums a son stâts curâts di Daria Miani, condutore



de trasmission tv, cul supuart dal Sportel Regjonâl pe Lenghe Furlane de ARLeF. La sielte didatiche dai materiâi di ogni volum e je stade curade des insegnantis Enza Purino e Laura Urtamonti. Lis ilustrazions dai protagoniscj a son di Serena Debegnach e di Alessia Battistutta.

Lis copiis a son stadis donadis a ogni Istitût daûr dal numar dai arlêfs che a studii il furlan. Altris copiis a son a disposizion dai insegnants di lenghe furlane e si puedin ritirâ tal Ufici VI Ambit Teritoriâl pe provincie di Udin cun sede in viâl Armando Diaz 60, dopo vê fate domande a cheste direzion di pueste elettroniche parfurlan@gmail.com

ARLeF AGJENZIE REGIONÂL PE LENGHE FURLANE



- ❑ Manovra ferroviaria (primaria e secondaria) su raccordo e impianti IFN
- ❑ Servizi integrati alla trazione ferroviaria, con soluzioni mirate alle specialità del servizio
- ❑ Progettazione e costruzione raccordi.

TS TRACTION & SERVICE S.R.L. SEDE LEGALE: VIA VILSBIBURG, 6/B1 - 33030 BUJA (UD)
Tel: 345 / 7109616 - E-mail: commerciale@traction-service.it